


Kuninjku Gospel Selections



Matthew and Luke in the Gunwinggu language of Australia

**Kuninjku Gospel Selections
Matthew and Luke in the Gunwinggu language of Australia**

Copyright © 2021 Wycliffe Bible Translators

Language: Kuninjku (Gunwinggu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-23

PDF generated using Haiola and XeLaTeX on 23 Aug 2023 from source files dated 23 Apr 2023
fe26f36a-e988-588e-9d17-68909910d7c4

Contents

Matthew	1
Luke	11

Matthew

Djodjib moy bukirri

¹⁸ Kune wanh yimerranj bu Jesus Christ dolkang. Meri [Mary] ngalu ngal-badjan nuye wanh birri-berrebom Djodjib [Joseph] bu kamene-marren, med, minj bedda bene-marrimeninj, wanh ngaleng kuk-bekkarrinj bu kuk-dulmuk-ni kure kun-ngudj nuye Nawaralmakkaykenh.

¹⁹ Kaluk Meri ngalengngarre na-bininkobeng Djodjib, nungka na-mak bininj, nungka minj djareniwirrinj bu bi-yemi-mulewayinj kure kabbal, nungka karre-marnbom bu kabi-bawon kure minj kabbal. ²⁰ Kaluk kumekke bu Djodjib kune bengkah-bengkang, wanh andjel [angel] nuye nawu Kaworhnhan Rowk bi-marne-bebmeng kure bukirri. Kaluk nawu andjel bi-marneyimeng, "Djodjib, nawu mawah-mawah ke Deybid [David], minj yi-kele yi-mang ngalu Meri bu yi-kan kure ku-red. Nawu wurdyaw kah-yaw-kan nakka wanh Nawaralmakkaykenh bi-yaw-wong. ²¹ Kaluk ngaleng ka-yaw-mang na-rangem, wanh ngudda yi-ngey-kurrmen Jesus nungka kan-kange-yerrke bininj rowk nuye kun-warre-kenh bedberre."

²² Kune wanh yimerranj kure nawu Kaworhnhan Rowk bu bi-marneyimeng nawu na-kare Aydjaya [Isaiah], bu yimeng, ²³ "Kaluk ngale ngal-yawk wanh ka-yaw-kan. Kaluk bu kabi-yaw-mang na-rangem, wanh bininj kabirri-ngey bun Yimanyuwel [Immanuel] (kaluk mane kun-ngey ka-yime, 'Kod kam-wam kure ngad karri-djarrkni')."

²⁴ Wanh Djodjib dolkkang, durrkmirri kure andjel nuye Kaworhnhan Rowk bi-marneyimeng. Wanh Djodjib bene-marrinj ngalu Meri.

Bi-kang kure ku-red nuye, ²⁵ minj bedda bene-yuwirrinj kaluk rerrih danginj nawu wurdyaw. Wanh Djodjib bi-ngey-kurrmeng namekke wurdyaw Jesus.

2

Bininj birri-kang koyek-beh birri-nang kinhkink

¹ Jesus wanh danginj kure kun-red ku-bolk-kimuk ka-bolk-ngeyyo Bedliyem [Bethlehem] kaluk kure ku-bolk-warlah ngalenggarre Djudeya [Judea] bu kumekke bolkyimerranj Ayrod [Herod] nawu King worhnang.

Wanh kumekke Jesus danginj, birri-buyika bininj nawu ben-bengdayhkeng kinhkink nawu birri-dolkkang koyek-beh djarreh, wanh birri-wam kure Djerud-jalem [Jerusalem]. ² Wanh bedda birri-djawayhmeng, "Baleh nawu wurdyaw danginj nawu ka-worhnhan bedberre bininj nawu Dju [Jews]? Wanh ngad ngarri-nang kinhkink nuye kure koyek djarreh ngarrih-ni, wanh ngad ngarrim-wam ngarri-marne-barddurrungkulhdanj nuye."

³ Kaluk kuneng kun-wok King Ayrod bekkang, nungka wanh njilng-warreminj, mak bininj rowk warridj nawu kumekke birrih-ni kure kun-red Djerudjalem birri-njilng-warreni. ⁴ Wanh Ayrod ben-kayhmeng birri-kihkimuk nawu kabirri-worhnhan djungkay mak nawu man-karre kabindi-bukkan birri-buyika bedberre kure kun-red Djerudjalem, wanh ben-djawam bu baleh nawu Christ danginj.

⁵ Kaluk bedda birri-marneyimeng, "Kure kun-red Bedliyem kure ku-bolk-warlah Djudeya [Judea] ngalenggarre. Nawu na-kare bi-wok-bimbom bi-wok-mulewam kuneng-kenh kure djurra, kure yimeng, ⁶ 'Ngudda kun-red Bedliyem, kure kun-red ngale-ngarre Djudeya, ngudda nawu ku-bolk-mak, yi-yurrrhke rowk kure ku-bolk-buyika ngalenggarre Djudah [Judah]. Wanh ngudda kumekke-beh kure ngudda, kam-re nawu bininj kabon-marne-worhnhan bininj nuye, nane nawu bininj

na-kudji kabən-nahnən bininj ngardduk nawu Yidjrayel [Israel] mawah-mawah, yiman ka-yime nawu djebed [shepherd] kabən-nahnən mayh nuye.' "

⁷ Wanjh King Ayrod ben-kayhmeng ben-marne-wokdi molkno birrimekke bininj nawu koyek-beh, wanjh ben-djawam bu baleh bolkyimeng ngalekke kinhhinh ben-marnebebmeng bedberre. ⁸ Wanjh King Ayrod ben-munkeweng birrimekke nawu bininj kure kun-red Bedliyem, ben-wok-rayekwong ben-marneyimeng, "Ngurri-yawa namekke wurdyaw kaluk ngurri-ngalke, ngurrim-ray werrk kandi-marneyime ba ngayemanwali nga-re nga-barddurrungkulhdan nuye."

⁹ Kaluk bu kumekke ben-marneyimeng nawu ka-worhnan, wanjh bedda birri-bolk-bawong, birri-wam. Wanjh kinhhinh birri-nang kure koyek, wanjh makka kuk-dokmeng bedberre wanjh kaluk danginj kure kumekke wurdyaw yongohyoy.

¹⁰ Kaluk bu birrimekke bininj birri-nang ngalekke kinhhinh, bedda wanjh birri-njilngmakminj, birri-djurkwong.

Bininj birri-kang koyek-beh birrim-kang birri-wong nuye na-makmak

¹¹ Wanjh birrim-wam kure ku-rurrik kure wurdyaw yongohyoy kaluk ngal-badjan dorreng bindi-djarrk-ngalkeng ngalu Meri [Mary]. Wanjh birri-marne-bard-durrungkulhdanj bu bedda birri-burlumeng nungka nuye. Yerre wanjh birri-dangmarrhmey nawu na-makmak birrim-kang bu birri-wong nuye. Kaluk nawu kold [gold] kun-wardde karlba marlahmarlheng, mak brangkindjendj [frankincense] manbu man-kurrik manjmak, mak mer [myrrh] manbu kun-karlkid yiman djarduk.

¹² Wanjh Kod ben-bengdayhkeng bukirri bu minj kabirri-durndeng kure King Ayrod, wanjh bedda birri-durndi kure bedberre kun-red, kure man-bolh-buyika ngalengarre kure birri-wam.

Birri-bolk-bawong birri-wam kure Yidjib

¹³ Kaluk bu kumekke birri-bolk-bawong nawu bininj birri-kang koyek, wanjh andjel [angel] bi-marne-bebmeng Djodjib [Joseph] kure bukirri, wanjh bi-marneyimeng, "Yirrolka! Yiben-ka wurdyaw ngalbadjan dorreng, ngurri-kelelobmen kure kun-red Yidjib [Egypt], King Ayrod [Herod] kabi-yawan nawu wurdyaw ka-djare kabi-bun. Wanjh ngurri-din kumekke kun-red kure Yidjib kaluk yawoh-marneyime ngudberre kumekke ngurri-bolk-bawon."

¹⁴ Wanjh ku-kak rerrih Djodjib dolkkang wanjh birri-wam Yidjib, bu ben-kang wurdyaw, ngalbadjan. ¹⁵ Wanjh birrih-ni kure kun-red Yidjib kaluk bu rerrih wanjh King Ayrod doweng. Kune yimeng kure Kaworhnan Rowk bi-marneyimeng nawu na-kare Yodjeya [Hosea] bu yimeng, 'Kaluk ngayi nga-kayhme nawu beywurd ngardduk kure Yidjib-beh'.

¹⁶ Bu Ayrod bengkang birrimekke bininj birri-kang koyek birri-wurhkeng, nungka wanjh ridduy. Wanjh ben-wok-rayekwong nawu kabirrih-durrkmirri nuye bu kabindi-ngalke nawu na-rahrangem rowk nawu bokenh man-djewk bedberre, mak nawu birri-yahwuyahwurd kure kun-red Bedliyem [Bethlehem] mak darnkih kure kumekke kun-red, bu kabindi-bun rowk.

Kune King Ayrod kurduyimeng, bengkang njale kun-dung bu wurdyaw danginj nawu koyek-beh bininj birri-wam kure Djerudjalem [Jerusalem]. ¹⁷ Wanjh woybukki danginj bu yimerranj kure nawu na-kare Djeremaya [Jeremiah] bimbom yimeng, ¹⁸ 'Kure kun-red ngalengarre Ramah [Ramah] wanjh birri-bekkang daluh-daluk birri-nalkiwam, birri-njilng-warreni. Wanjh ngalekke ngalu Reydjel [Rachel] ben-marne-nalkbom ngalengarre wurdurd, mak minj djareniwirrinj nangale bi-njilngmarnbuyinj, birrimekke wurdwurd wanjh ngalengarre birri-doweng.'

¹⁹ Kaluk bu King Ayrod doweng, nawu andjel nuye Kaworhnhan Rowk bimarne-bebmeng Djodjib kure bukirri, kure birrih-ni kun-red Yidjib. ²⁰ Wanjh nawu andjel bi-marneyimeng, “Yi-rrrolka, yiben-ka ngal-badjan, wurdyaw. Ngurri-durndeng kure kun-red ngalenggarre Yidrayel [Israel]. Bininj nawu birri-djareni birri-buyinj nawu namekke wurdyaw bedda wanjh birri-doweng”.

²¹ Wanjh Djodjib dolkkang ben-mey wurdyaw ngal-badjan wanjh birri-durndi kure kun-red Yidrayel. ²² Kaluk bu Djodjib bi-woh-bekkang Arkelaya [Archelius], nawu beywurd nuye King Ayrod, worhnah-worhnang kumekke kun-red kure kornkumo nuye worhnang kure kun-red ngalenggarre Djudeya [Judea]. Wanjh Djodjib keleminj minj rayi kumekke niwirrinj. Kaluk kumekke andjel bi-bengdayhkeng Djodjib kure bukirri, nungka wanjh wam ku-bolk-buyika kure ku-bolk-kimuk ngalenggarre kun-red Kalilee [Galilee]. ²³ Kaluk kure kun-red ka-bolk-ngeyyo Nadjared [Nazareth], wanjh kumekke bedda birrih-ni. Wanjh kumekke birri-woybukwong manbu kun-wok kure nawu birri-kare birri-yingkih-yolyolmeng nawu Jesus, “Nungka nawu Na-kang Nadjared”.

21

Bininj birri-burlumeng Jesus bu wam ngimeng kure kunred Jerusalem

¹ Bu Jesus mak nawu ben-bukkang nuye bininj birri-wam darnikh kure kunred Jerusalem, bedda wanjh birri-woh-di kure kunred Bedbadji [Bethphage] kure mandulum kabolk-ngeyyo Olives. Wanjh kumekke Jesus ben-munkeweng bene-bokenh nuye bininj nawu ben-bukkang. ² Kumekke wanjh ben-marneyimeng, “Ngune-ray kure kunrurrk-wern, ngune-ngimen ba ngurben-ngalke bokenh donkey kumekke kabene-di ngalbadjan, yaw kabeneh-dukkayindi. Wanjh ngurben-yerrkemen, ngurben-ka kure ngayi. ³ Bu yiman nangale ngun-djawan ngurrewoneng bu njalekenh ngurben-kan nawu donkeys, wanjh ngurben-marneyimen nawu Kaworhna ka-djare berrewoneng. Werrk ngundi-won.

⁴ Kune wanjh kurduyimerranj bu kunyungki kunwok kurrmeninj bu kamwam woybukki kure nakare Zechariah kure yimeng, ⁵ “Ngurben-marneyimen bininj kure kubolk-kimuk ‘Ngurri-na nawu Kaworhnhan kamh-re kumekke kure ngudda. Nungka minj nabang, nungka nawu namak duninh. Nungka kamh-re kam-barndi kure ngalkerrnge donkey.”

⁶ Wanjh nawu bininj nuye ben-bukkang bene-wam bene-kurduyimeng kure nungka Jesus ben-marneyimeng berrewoneng. ⁷ Wanjh bene-kang donkey yaw ngalenggarre. Wanjh kumekke bene-barrkbom berrewoneng kunmadj. Nungka Jesus djal-barndi kure donkey. ⁸ Kaluk birri-wern bininj birri-di bedda birri-madj-yerrkerrinj nawu nakuyeng wanjh birri-kurrmeng kure manbolh. Nawu birri-buyika bininj birri-dulk-dadjdjeng birri-kang birri-kurrmeng kure manbolh. ⁹ Wanjh birri-wern bininj birri-dokmeng nuye Jesus. Nawu birri-buyika, birri-munkekadjung birri-kayhmeng birri-yimeng, “Mah. Karri-yimen Hosanna! God bene-djarrk-wam namekke bininj nawu Beywurd nuye David! Nungka kamh-re kure kunngay nuye nawu Kaworhnhan Rowk. Namekke wanjh God kabi-marne-kurduyimen kunmak. Karri-yimen Hosanna God nawu Kaddum kah-ni.”

¹⁰ Bu Jesus wam ngimeng kure kunred Jerusalem wanjh nawu bininj rowk kumekke birri-ni birri-kange-barrhmeng rowk, birri-djawarrinj, “Nangale bininj kam-wam kadberre?” ¹¹ Wanjh birri-wern bininj bindi-wokmey birri-yimeng, “Name wanjh Jesus nawu kunwok kam-kan nuye Ngabbard, nakang Nazareth kure kubolk-kimuk ka-bolk-ngeyyo Galilee, nakang kumekke-beh kam-wam.”

26

Judas bi-djawarraykang Jesus

¹⁴ Jesus ben-karrmeng 12 djawirna. Nakudji namekke bininj nawu ngeyyoy Djudas Iskariod. Wanjh wam ben-yikang kure nawu birri-kihkimuk djungkay kure birri-wokmarnburrinj. ¹⁵ Nungka ben-djawam kunwardde, bu ben-marneyimeng, “Njale kandi-karremulewan bu Jesus bidkenwon ngudberre?” Bedda wanjh birri-wong kunwardde nawu 30 silver coins. ¹⁶ Wanjh bu rerre Judas dedjmey bolkyawam baleh keno bu Jesus kabirri-mang nawu birriwarre bininj.

Jesus mak nuye bininj birri-djarrk-nguneng manbu Passover mulil

¹⁷ Mandjewk la mandjewk, Djus bininj birri-karrmeng mulil kunkamak ngeyyoy Manlod-berelhmiken Kandidjdjawa. Kunyungki benbekad kunkamak birri-karrmeng Passover mulil. Kunekke benbekad rerrih, djawirna nuye birrim-yikang Jesus, birri-djawam, “Baleh yi-djare ngarri-marnbun ba manme karri-ngun manbu Passover mulil?” ¹⁸ Wanjh Jesus yimeng, “Ngurri-ray kure kubolk-kimuk wanjh ngurri-nan namekke bininj, ngurri-marneyimen, ‘Nawu Kanbukkan ka-yime korroko wanjh darnkih kamh-re ka-bolkyimerran nuye. Ka-djare Passover mulil ngarri-ngun nuye djawirna kaluk kure nguddangke kurrambalk.” ¹⁹ Wanjh djawirna nuye birri-wam, kure birri-yingkih-marnbom ngalenggarre Passover mulil.

²⁰ Kaluk bu ngokdanj, Jesus wanjh neyhneykendi kure balabbala ‘table’, birri-djarrk-nguneng nawu 12 djawirna. ²¹ Wanjh bu birrimekke birri-nguneng manme, Jesus ben-marneyimeng, “Ngayi woybukki marneyime ngudberre: nakudji bininj ngudberre ngan-kukweykan kure birri-warre bininj.” ²² Bedda ben-njilng-warrewong nuye djawirna. Wanjh birri-bebbeh-marneyimeng Jesus, “Nawu Yiworhnhan, yiddok ngayi kukweykan ngudda?” ²³ Jesus yimeng, “Nawu ngane-djarrk-bid-djuhme kure ngalanno wanjh namekke ngan-kukweykan.” ²⁴ Kaluk ngan-marne-bolkyimerran ngayi nawu Bininj Duninh kure ka-kurduyimerran ngardduk. Ngayi nga-rrowen. Wok-kurmerrinj Ngabbard kunkare. Bininj ngan-kukweykang ngayi, kukwarrewong kure Ngabbard. Nungan Ngabbard kaluk kabi-kukmorrong namekke bininj bu munguyh munguyh. Kunukka kamakniwirrinj.

²⁵ Djudas korroko bengkan bu Jesus bi-marneyimeng. Wanjh yimeng, “Nawu Kanbukkang, yiddok ngayi kukweykan ngudda?” Wanjh Jesus yimeng, “Yoh. Makka nguddangke kunwok.”

Jesus mulewarrinj nuye kundarrkid mak kunkurlba

²⁶ Kaluk bu kumekke bedda birri-nguneng manme, wanjh Jesus lod-mey manbu kandidjdjawa wanjh bi-manjbom Kod. Rerre wanjh lod-bakkeng, wanjh ben-wong nuye djawirna wanjh ben-marneyimeng, “Ngurri-ma mane kandidjdjawa, wanjh ngurri-ngu. Mane wanjh kundarrkid ngardduk.” ²⁷ Wanjh ngalanno warridj mey, bi-yi-manjbom Kod, wanjh ben-bowong nuye djawirna wanjh ben-marneyimeng, “Ngurri-wern ngurri-bongu mane. ²⁸ Mane ngardduk kunkurlba manbu ka-menyeime bu Kod wok-kurrmerrinj bu mulewarrinj nungka ka-djare kaben-bengmidjdan bininj. Mane kunkurlba ngardduk ka-bowarrhme bedberre birri-djal-wern bininj ba bu Kod kaben-bengmidjdan bedberre kure kunwarre. ²⁹ Kune wanjh bengdayhke ngudberre, ngayi minj nga-yawoyh-bongun mane barnem-no kunkalkid, kaluk karri-yawoyh-djarrk-bongun bu rerrikah kumekke kure kubolk-kimuk Ngabbard kah-ni nawu Kaworhnhan Rowk ngardduk.”

³⁰ Kaluk bu birri-wayini manbu yiwarrudj wanjh birri-wam kure mandulum kabolkngeyyo Olives.

Jesus Bi-mulewam bu Bida (Peter) Kabi-waralkukwakwan

³¹ Wanjh Jesus ben-marneyimeng djawirna nuye, "Bu bolkkime kukak ngudda kandi-bawon, ngurri-kelerlobme. Korroko Kod yimeng nawu: "Ngayi nga-bun nawu shepherd, nawu mayh sheep wanjh nakka kabirri-kelerlobme kure kubolk-buyika." Kod wokkurmerrinj kure Nadjamun Djurra. ³² Kaluk bu rerre Kod ngan-dolkkayhwe kure kumidj. Kaluk nga-yingkih-dokme ngudberre kure kunred Kalili.

³³ Wanjh Bida (Peter) yimeng, "Bedda birriwern kabirri-kelerlobme, ngayi minj nga-kelerlobme bu ngudda-kenh." ³⁴ Kaluk Jesus bi-marneyimeng, "Nga-yime ke woybukki, Bu bolkkime kukak, ngudda wanjh kan-waral-kuk-wakwan bu bokenh kunkudji-kenh, bu rerre bawurl ka-kayhme." ³⁵ Wanjh Bida (Peter) yimeng, "Kunukka minj ngayi nga-yime bu waral-kuk-wakwan! Ngayi ngarr-djarrk-di kure baleh ngayi nga-rrowen kure ngudda!" Mak nawu birriwern djawirna nuye nakka mak warridj kuneke rerrih birri-yimeng.

Jesus di yiwarrudj kure kunred Kedsemani (Gethsemane)

³⁶ Wanjh Jesus birri-djarrk-wam nawu djawirna nuye ben-bukkang kure kunred kabolk-ngeyyo Kedsemani (Gethsemene). Wanjh ben-marneyimeng, "Kondanj ngurri-nin nga-re kuni. Nga-rri yiwarrudj." ³⁷ Jesus ben-kang Bida (Peter) mak bene-bokenh nawu bebeywurd nuye Zebedi, nungka dedjmey bu njilng-warreminj mak kange-warreminj. ³⁸ Wanjh ben-marneyimeng, "Ngayi nga-njilng-warre kure kandji ngardduk kundurddu ka-djokkohme. Wanjh kondanj ngurri-nin, ngurri-bolknahna bu ngayi ngam-durndeng."

³⁹ Kaluk bu wam kure minj djarreh-kah la darnkih, kumekke kukwerrinj kumirrk nuye kure kukurlk wanjh yiwarrudj di, wanjh yimeng, "Ngabba, wanjh kune kamak, wanjh yuwn kan-bowon mane ngalanno kure nga-bongun manbu kure nga-djak-bekkan-kenh. Wanjh bonj, nga-kurduyime kure ngudda yi-djare, minj kure ngayi nga-djare."

⁴⁰ Wanjh Jesus durndi kure djawirna nuye, wanjh ben-nang birrih-kodjdjeyoy. Wanjh bi-marneyimeng nawu Bida (Peter), "Ngudda minj karri-djarrk-worhnayinj bu kundjungbu? ⁴¹ Mak ngurri-bolknahna mak yiwarrudj ngurri-din ba kunukka kunngudj ngun-won ngudberre mak nawaerre minj ngun-djurrkkan ngudberre mak ngun-marnbun bu ngurri-yime kunwarre. Wanjh kunmalng ngudberre makka kadjare kunmak ka-yime, mak kungudj kure kunburrk ngudberre makka manngudj-warre."

⁴² Jesus durndi yawoyh-di yiwarrudj, yimeng, "Ngabba, minj nga-djare nga-djak-bekkan. Kure ngudda yi-djareni bu nga-djak-bekkan, kune wanjh ngayeman ngakurduyime kure ngudda yi-djareni ngardduk."

⁴³ Wanjh yawoyh-durndi ben-nang birri-kodjdjeyoy, birri-kodjdjewakwarrinj. ⁴⁴ Wanjh Jesus durndi bokenh kunkudji-kenh di yiwarrudj, kunyawoyh-kudji yimeng mankare yerrih kunwok.

⁴⁵ Wanjh Jesus yawoyh-durndi kure djawirna nuye kure birrih-yoy, wanjh yimeng, "Yiddok ngudda ngurri-djal-kodjdje-mulmurrngkarren mak ngurrih-djal-yo? Ngurri-na! Wanjh korroko kamh-yimerran kamh-re darnkih nawu bininj ngan-kuk-weykang ngayi nawu Bininj Duninjh kure birriwarre bininj ngandi-mang. ⁴⁶ Wanjh ngurri-dolkka, karri-re. Wanjh ngurri-na nane nawu bininj kamh-re nawu ngandjarrwarraykang, ngan-kuk-weykan."

Jesus Wanjh Birri-mey

⁴⁷ Bu Jesus munguyh wokdi-wokdi wanjh Judas kam-wam nawu birri-djarrk-wam 12 kure Jesus nuye djawirna. Mak birri-wern bininj birrim-djarrk-wam nawu birrim-kang mandjawak mak kundulk. Nawu birrikikhimuk djungkay mak nawu dabborrabbolk nawu bindi-marne-worhnang bininj wanjh bindi-munkeweng.

⁴⁸ Korroko Judas karremarnbom bu ben-bengdayhkeng bu yimeng, "Wanjh bininj nawu nga-bunjhmg wanjh nakka Jesus nawu ngurri-mang." ⁴⁹ Kaluk kuneke rerrih Judas bi-yikang Jesus, bu yimeng, "Ngudda nawu kanh-bukkang! Kamak bu ngarr-keb-narren". Rerre wanjh bi-bunjhme. ⁵⁰ Wanjh Jesus yimeng, "Nawu ngarr-dabbolk, wanjh yi-djal-kurduyimen kure yim-wam-beh." Wanjh birrimekke nawu birrim-yorrmeng birrim-wam birri-darrkid-mey Jesus.

⁵¹ Kaluk bu kumekke birri-mey Jesus, wanjh nakudji bininj nawu Jesus djawirna nuye yirrhme nawu mandjawak nakimuk wanjh bi-kanem-dadjdjeng nawu bi-marne-durrkmirri nuye djungkay. ⁵² Wanjh Jesus bi-marneyimeng namekke nawu nuye djawirna, "Yi-bawo nawu mandjawak nakimuk. Yi-kurmen kure yi-mey. Nangale nawu ka-mang mandjawak, nakka wanjh mandjawak kabon-bun. ⁵³ Ngudda minj ngurri-bengkan bu nga-djare-niwrinj nga-djawayinj Ngabbard, wanjh ben-munkewemeninj birriwern angels nawu 12 djuram. ⁵⁴ Wanjh bonj, nga-djare ka-kurduyimerran ngardduk kure Djurra Nadjamun ka-wok-bimdi ngardduk kure ngan-yolyolmeng kunkare."

⁵⁵ Wanjh Jesus ben-marneyimeng birriwern nawu birri-kuniwam. Yimeng, "Ngudda kandi-kuniyikang mandjawak dorreng mak kundulk dorreng, yiman ngayi nabang rerre. Bu kunbenbekad-kuyeng rowk, ngayi ngah-ni kure Temple kure kuberrk bu ngaben-bukkang, minj ngudda kumekke kandi-mayinj. ⁵⁶ Wanjh kuneng rowk kure baleh kurduyimerran wanjh ka-woybukkenwon kure birri-kare birri-bimbom kure korroko birrih-ni." Kune bu Jesus yimeng. Wanjh djawirna nuye birri-bawong, birri-kelerlobmeng.

27

Jesus birri-kang kure Baylad

¹ Bu djarreh kam-barrhbom, nawu birri-kihkimuk djungkay mak nawu kabirri-wohrnan dabborrhbbolk birri-wokmarnburrinj bu Jesus wanjh kabirri-bun ka-rrowen. ² Kumekke birri-dukkang wanjh birri-kang kure worhnang nawu ka-ngeyyo Baylad [Pilate]. Nungka nakang Rome.

¹¹ Jesus wam kure kumirrk nuye Baylad nawu worhnang. Nungka bi-djawam, "Yiddok ngudda yi-worhnang nawu bedberre Djuws [Jews] bininj?" Jesus bi-marneyimeng, "Yoh. Makka nguddangke kunwok." ¹² Nawu birri-kihkimuk djungkay mak dabborrhbbolk birri-djuhbom Jesus, nungka minj wokdiwirrinj. ¹³ Wanjh Baylad bi-marneyimeng Jesus, "Yiddok ngudda minj yi-bengkan bu ngundih-djuhbom kure njalehnale-kenh?" ¹⁴ Jesus minj ben-wokmayinj bu yimeninj kure kunwern birri-djuhbom. Wanjh Baylad yimeng, "Njalekenh minj yiben-wokmang?"

Baylad ben-bidkenwong Jesus kure birri-bang birri-bid-dulubom

¹⁵ Mandjewk la mandjewk bu birri-karrmeng mulil ngalenggarre nawu worhnang wanjh bi-yerrkkeng na-kudji bininj bebmeng wam kure birri-kaberrkdi bininj. Birriwern bininj birri-kuknang nangale birri-mey. ¹⁶ Wanjh kumekke na-kudji bininj rurrkkendi, nawu ngeyyoy Barabbas. Kaluk namekke birri-wern birri-bengkang na-warreni duninjh. ¹⁷ Bu bininj birri-raworrinj kure Baylad wanjh nungka ben-djawam, yimeng, "Na-ngale ngurri-djare nga-bebke ngudberre, Barabbas? O Jesus nawu ka-ngeyyo 'Christ'?" ¹⁸ Kaluk Baylad ben-bengkang birrimekke bininj birri-bidkenwong Jesus kure nungka bu bedda wanjh birri-kirnweng.

¹⁹ Kaluk Baylad rerrkang kure ben-djadme nuye kure ningih-ni. Baylad nuye ngal-bininkobeng bi-marne-munkeweng kunwok, yimeng, "Yuwn baleh yi-marneyime namekke bininj, yi-bawo. Nungka minj njale warrewoyinj. Bolkki ngayi nga-bukirribom nungka. Wanjh ngan-njilng-warreminj."

²⁰ Wanjh birri-kihkimuk djungkay mak nawu dabborabbolk bindi-marneyimeng birri-wern, "Ngurri-marneyimen Baylad, 'Barabbas kam-bebme, Jesus dowimen.'".
²¹ Kaluk Baylad yimeng, "Ngaben-karrme bene-bokenh: Barabbas, Jesus. Wanjh na-ngale ngurri-djare nga-bebke ngudberre?" Birri-wern birri-yimeng, "Barabbas!"
²² Wanjh Baylad djawayhmeng, "Nane Jesus - baleh nga-yimewon nawu ka-ngeeyyo 'Christ'?" Wanjh bedda rowk birri-yimeng, "Ngurri-bid-dulubu kure kun-dulk cross!" ²³ Baylad yimeng, "Njale warrewong?" Wanjh bedda birri-wernh-kayhmeng munguyh, "Ngurri-bid-dulubu kure kun-dulk 'cross'!"

²⁴ Baylad ben-nang minj baleh yimeninj. Bedda bininj wanjh birri-ridduy. Wanjh nungka kunronj bomey bid-djirridjburrinj kure kumirrk bedberre bedda bininj. Ben-bukkang ba minj nangale bi-djuhbuiyinj. Yimeng, "Nga-bid-bele. Ngayi minj kandi-djuhbun bu nane bininj ka-rrowen. Ngudda ngurri-djareni bu ngurri-durrkmirri." ²⁵ Bedda birri-yimeng, "Kan-djuhbun ngadberre - ngad mak wurdwurd ngadberre - bu nungka ka-rrowen!" ²⁶ Wanjh Baylad bi-bebkeng Barabbas bedberre. Wanjh nawu Jesus ben-bidkenwong bininj nawu birri-widjbirhkeng kunyarl dorreng. Ben-marneyimeng birri-bang birri-bid-dulubom kure kundulk.

Nawu Djamun Birri-djekmiwong Jesus

²⁷ Nawu Baylad nuye djawirna birri-ngimihweng Jesus kure bedberre kurruk-kimuk, mak birri-wern nawu birri-bang birri-raworrinj nuye. ²⁸ Wanjh birri-yerrkkeng kun-madj nuye, mak na-buyika birri-djongbom nawu yiman nawu worhnang nuye kun-madj djongburrinj, nawu kuk-buyika man-burrba. ²⁹ Mak birri-bang birri-mey kinj man-mirrh-yih, wanjh birri-marnbom kodj-burlh nawu kun-kodj-kenh, rerre wanjh birri-marnekurrmeng kure kun-kodj nuye. Kunkan-inj birri-marne-kurrmeng kure ku-bidkun nuye, yiman nawu ka-worhnaw nuye. Wanjh birri-boddanj kure kumirrk nuye wanjh birri-djekmiwong Jesus, wanjh birri-marneyimeng, "Ngundi-burlumeng ngudda yi-worhnaw bedberre bininj nawu Djuws!" ³⁰ Mak birri-kuknunjbom. Birri-yimey manekke kunkaninj wanjh birrih-bom kure kunkodj nuye. Munguyh birri-djal-bom. ³¹ Bu bedda birri-ngurdmeng bu birrih-bom, wanjh birri-yerrkkeng nawu kukbuyika kun-madj djong-buh-djongburrinj. Birri-djongbom nawu nuye kunmadj. Wanjh birri-kang birri-wam kure birri-barnnameng nungka.

Jesus Birri-kuk-barnnameng

³² Kumekke wanjh birri-yi-bebmeng kure ku-berrk, kumekke birri-nang na-kudji bininj nawu Sayrin-beh [Cyrene] nawu ngeyyoy Saymon [Simon]. Birri-djurrkkang nungka ngorrkan kure kunkarlang nuye kun-dulk 'cross' nuye Jesus. ³³ Wanjh birri-bebmeng kure ka-bolkngeeyo Kolkoda [Golgotha] manbu ka-yime "Kun-red ngalenggarre kun-kodjmurrng". ³⁴ Birrimekke birri-bang birri-bowong Jesus, birri-rawong kun-bang mak birri-mey kure kun-dulk ngalenggarre kun-kalkid birri-bo-wong ngudkeng nuye kun-kanjbabang. Wanjh Jesus bo-bekkang manekke kun-bang wanjh nungka warnyakminj, minj bonguyinj, bekkang manbang. ³⁵ Kaluk bu bedda birri-dulubom kure kun-dulk 'cross', wanjh birri-madj-yerrkkeng, birri-dahkenweng. Nakudji nabang ben-marneyimeng, "Ngudda yi-winhme ngurri-kang kunmadj nuye Jesus". ³⁶ Wanjh birrimekke birri-bang birri-rerrkang, birri-nahnang. ³⁷ Kaddum kure kundulk birri-kurrmeng kunngey ngeyyoy, "Nane Jesus nawu worhnaw bedberre bininj nawu Djuws".

³⁸ Mak bene-bokenh bininj nawu bene-bangni, wanjh bindi-djarrk-barnnameng Jesus dorreng. Na-kudji kukbarndi kure ku-kun nuye Jesus. Na-buyika kukbarndi kure kudjakku nuye. ³⁹ Bininj birri-wam birri-yurrikeng, nakka kun-warre birri-yimeng nuye Jesus, mak birri-marnewarnyakminj nuye. ⁴⁰ Birri-marneyimeng,

"Ngudda yi-yimeng bu yi-rurrk-bakke manbu Dembel [Temple], kaluk yi-yawoyh-rurrkmarnbun kun-kodjdje man-kudji bokenh! Bolkki wanjh yi-rrrolka! Yim-kolu kure 'cross' kun-dulk bu ngudda woybukki Beywurd nuye Kod!"

⁴¹ Wanjh nawu birri-kihkimuk djungkay, mak nawu kabindi-bukkabukkan man-karre, mak nawu dabborrabolk warridj birrih-duy Jesus. ⁴² Mak birri-marneyimerrinj, "Nungka ben-kukmarnbom birri-buyika bininj mak minj kakukmarnburren nungan weleng-kenh! Mak nungka wanjh ka-worhnan kadberre nawu Yidrayel [Israel] bininj! Wardi kam-kolu kure 'cross' kun-dulk ba karri-woybukwon! ⁴³ Nungka kabi-woybukwon Kod mak bolkki wanjh Kod bi-kukmarnbu, bu nungka kabi-marnedjare. Kone wanjh nungan welengken yimeng, 'Ngayi Beywurd nuye Kod'."

⁴⁴ Kunekke rerrih mak bininj bene-bokenh bene-yimeng nawu bindi-barnnameng Jesus dorreng bu beneh-duy.

Jesus Doweng

⁴⁵ Kaluk bu benbekad buldjnjarn dung-yibmeng, wanjh kumekke ku-bolkwern kakbakmeng rowk, ben-karrmeng bokenh kun-kudji minj kun-kuyeng ben-karrmeninj.

⁴⁶ Kaluk bu wolewoleminj bokenh kun-kudji kun-dung yimerranj, Jesus kayhmeng wernkih, bu yimeng, "Yilay! Yilay! Lama sabachthani?" (mane kunwok ka-yime, "Ngardduk Kod! Ngardduk Kod! Njale ngayi kan-bawong?")

⁴⁷ Kaluk birri-buyika bininj nawu kumekke birrih-di birri-bekkang wanjh birri-yimeng, "Nakka kabi-hayme Yilaydja [Elijah]!" ⁴⁸ Wanjh na-kudji bininj rlobmeng wernkih mey nawu kun-madj na-kerlkkerlk wanjh djuhkeng kure kunbang warrem-inj, wanjh dukkang kure kun-dulk kumekke wanjh bi-bowoyinj bu Jesus bonguyinj. ⁴⁹ Birri-buyika bininj birri-yimeng, "Med, karri-bawo, wardi karri-nan Yilaydja kamre ba kabi-kukmarnbun."

⁵⁰ Wanjh Jesus kayhmeng kun-kimuk, yerre wanjh nungan baworrinj bu ngerhyakminj, wanjh doweng.

⁵¹ Kunekke rerrih nawu man-burrba barndih-barndi kure Dempel [Temple] ku-rurrk nakka wanjh djalkmiwam bu bakmeng bokenh, kaddum djalkmiwam kam-koluy kanjdji. Warridj bolk-rokang mak wardde-barabarrhmeng. ⁵² Mak nawu birrih-dudjendi kure ku-midj nakka wanjh dangmarrhmiwam bedberre, wanjh birriwern nawu Kod nuye bininj nawu kunyungki birri-doweng, nakka wanjh birri-yawoyh-kerrngehminj. ⁵³ Kaluk bu Jesus yawoyh-kerrngehminj kure ku-midj wanjh bedmanwali birrimekke bininj birri-dolkang kure kumidj-beh, birri-wam kure ku-bolkkimuk kubolk-djamun kure birri-wern bininj bindi-nang.

⁵⁴ Nawu birri-bang birri-nahnang Jesus kumekke birrih-di, mak nawu 'centurion' nawu kaworhnan bedberre dorreng. Bu birri-nang kun-red bolrokang mak njalehnjale nawu kurduyimeng, bedda wanjh birri-keleminj, wanjh birri-yimeng, "Woybukki duninh nane bininj Beywurd nuye Kod".

⁵⁵ Birri-wern daluk-daluk birri-munkekaydjuy Jesus kure Kalili [Galilee] mak birrih-nahnang, nakka mak birrimh-di djarreh kure 'cross' kundulk, wanjh birrih-nang.

⁵⁶ Wanjh birri-djarrkni ngalekke Meri Makdalen [Mary Magdalene], mak ngalu Meri ngal-badjan bedberre Jesus, Djayms [James], Djosib [Joseph], mak ngalbuyika ngalu daluk ngalbadjan berrewoneng Djayms, Djon [John] nawu Zebedee [Zebedee] ben-bornang.

Jesus birri-kuk-kurrmeng kure kuwardde-rurrk

⁵⁷ Bu Jesus ben-bukkabukkang, nakudji bininj kam-dolkang nakang kunred Aramadiya [Aramathea]. Ngeyyoy Djosib [Joseph]. Nungka wanjh barndi. ⁵⁸ Kaluk ngokdanj, Djosib wam bi-yikang Baylad [Pilate], wanjh bi-djawam yimeng, "Kamak bu

kan-kukwon Jesus." Wanjh Baylad ben-wokrayekwong nawu djamun nuye ba Jesus kabirri-kukwon nawu Djodjib. ⁵⁹ Wanjh nawu Djodjib bi-kukmey Jesus wanjh bi-kuk-dukkang nawu na-bele manburrba. ⁶⁰ Wanjh bi-kuk-kang bi-kuk-kurrmeng kure kuwardde-rurrik. Manekke wanjh Djodjib nuye, man-kerrnge kure nungka warddedadjdeng. Wanjh wardde-djirrkang man-wardde-dulmuk kure dang-balhmeng kure dang-rurrik-ni wanjh bolk-bawon, wanjh nungka wam. ⁶¹ Kunekke rerrih Meri Makdalen, ngal-buyika Meri bene-wam bene-rerrkang kure kabbal borledmi-kenh.

Djamun birri-bolk-nahnang kure Jesus birri-kurrmeng

⁶² Kunkodjdje-buyika manbu benbekad ngalenggarre 'Sabad' ['Sabbath'], wanjh nawu birri-kihkumuk djungkay mak nawu Barisis [Pharisees] birri-yikang Baylad. ⁶³ Wanjh birri-marneyimeng, "Nawu yi-kimuk, ngad ngarri-bengkan bu namekke Jesus nawu kurrih-kurrinj, bu darrkid-ni wanjh kune yimeng, 'Bu kun-kodjdje bokenh man-kudji rerre, ngayi wanjh nga-yawoyh-dolkkan kure kun-dowikenh.' ⁶⁴ "Yiben-wokrayekwo birri-buyika birri-bang ba kabirri-dang-nahnang kure kunwardde-rurrik bu ka-yimerran kun-kodjdje bokenh kun-kudji. Mak nawu djawirna nuye wardi kabirrim-re kabirri-mang wanjh kabindi-marneyime birri-buyika bininj bu nungka dolkkang kure kun-dowikenh. Jesus kurrinj bu kun-yungki bu kun-yungki bu mulewam nungka dolkkayinj. Wanjh kaluk bu nuye djawirna kabirri-mulewam nungka dolkkang, wanjh kabirri-kurren kure kun-kimuk duninjh!" ⁶⁵ Wanjh Pilate ben-marneyimeng, "Mah! Wanjh ngurben-ka birri-buyika birri-bang ba kabirri-wernh-dang-nahnang kure baleh ngudda ngurri-bengkan." ⁶⁶ Birri-wam birri-dang-barlhmeng, birri-dang-rayekwong ba minj nangale ka-rrangmarrhmang. Birri-bang birri-di birri-dang-nahnang.

28

Jesus yawoyh-dolkkang kure kumidj-beh

¹ Bu benbekad ngalenggarre Sabbad [Sabbath] bu yakminj, wanjh kunkudji bu kam-yimerran Sunday bu djarreh kam-barrhbom, wanjh Meri Makdelen mak ngal-buyika Meri bene-wam bene-bolk-nang kure ku-midj kure kuwardde-rurrik.

² Kaluk kunekke rerrih kunkimuk bolk-rokang. Andjel nuye nawu Kaworhnhan Rowk kam-koluy kure kaddum-beh, wam kure kuwardde-rurrik, wanjh wardde-djirrkang manbu manwardde-kimuk. Wanjh rerrkang kure kuwardde kaddum.

³ Kaluk nungka kuk-waydi yiman namarrkon kah-mayhke mak kun-madj nuye djongbu-djongburrinj madj-beleminj yiman ka-yime waydi kunngol. ⁴ Nawu birri-bang birri-dang-nahnang nakka wanjh birri-keleminj bu birri-nang nawu andjel, mak birri-deldelmeng, mak birri-kuk-mankang yiman rerrih birri-doweng.

⁵ Wanjh andjel ben-marneyimeng daluk bokenh, "Yuwn ngune-kele, ngayi ngabengkan bu ngudda nguneh-yawan Jesus nawu birri-kuk-barnnameng kure kundulk cross. ⁶ Nungka minj kondanj ka-rri. Nungka Kod bi-rrolkayhweng kure yimeng ngudberre. Ngunem-ray ngune-bolk-nan kure kundarrkid nuye birri-kurrmeng. ⁷ Werrk ngune-durnde ngurben-marneyimen nawu ben-bukkabukkang nuye. Ngurben-marneyimen, 'Jesus yawoyh-dolkkang kure kundowi-ken. Nungka ka-rrrokme ngun-madbun ngudberre kure Kalili kaluk kumekke ngurri-nan.' Mane kunwok ngurben-marneyimen. Ngayi ngam-wam marneyime ngurrewoneng."

⁸ Kaluk nawu daluk bokenh werrk bene-bolk-bawong kumekke wanjh bene-marrkinwam. Bedda bene-djurrikwong, mak bedda bene-keleminj warridj. Bene-djareni bindi-marne-mulewayinj bininj nawu ben-bukkang nuye Jesus kure baleh yimeng. ⁹ KKumekke minj djarreh bene-rlobmeninj, kumekke bene-darnh-nang kumirrk Jesus. Ben-ngeybom berrewoneng. Wanjh nawu

daluk bokenh benem-yikang darnkih bene-marne-bard-durrungkulhdanj nuye bene-denge-karrmeng. ¹⁰ Jesus ben-marneyimeng berrewoneng, “Minj ngune-kele. Ngune-ray ngurben-marneyimeng nawu ngayi ngarri-danginj kabirri-re kure Kalili kaluk kumekke ngandi-nan.

Djamun bindi-marne-mulewam nawu birri-kihkimuk djungkay

¹¹ Wanjh kumekke nawu daluk bokenh bindi-yikang bininj nawu ben-bukkang nuye Jesus. Wanjh nawu birri-nang birri-dang-nahnang birri-wam kure kubolk-kihkimuk, mak bindi-marne-yolyolmeng nawu birri-kihkimuk djungkay kure baleh yimerranj bedberre. ¹² Wanjh djungkay birri-kaberrk-raworrinj bininj nawu dabborabbolk deleng, wanjh birri-karre-marnbom. Bu bedda birri-djareni nawu birri-bang birri-kurrinj. Bu bedda bindi-karre-mulewam nawu birri-bang nakimuk kunwardde. ¹³ Bindi-marneyimeng, “Ngurben-marneyimen nawu bininj, bu bininj nawu Jesus ben-bukkabukkang birrim-wam kukak bu birri-djirdmey kure ngudda ngurrih-kodjdjeyoy. ¹⁴ Bu ‘governor’ ngun-wobekkan ngudberre bu kuneng-ken, kaluk ngadman ngarri-wokdi, minj nun-djuhbun ngudberre. Yuwn ngurri-njilng-warre.” ¹⁵ Wanjh birri-bang birri-mey kunwardde. Birri-wam wanjh bindi-marneyimeng kure birri-wern bininj, bindi-kurrinj. Wanjh birri-wern bininj nawu Jews birri-bekkang manekke ka-kurren kunwok. Wanjh kumekke birri-wern bininj nawu Jews kabirri-woybukwon munguyh manekke manu ka-kurren kunwok.

Jesus kaben-munkeweng nuye bininj kabindi-bukkan birriwern bininj ba kabirri-munkeykaydjung

¹⁶ Nawu birrimekke ¹¹ nawu ben-bukkabukkang nuye birri-wam kure Kalili wanjh birri-wam kure mandulum, kure Jesus ben-marneyimeng wanjh kumekke birri-narren. ¹⁷ Wanjh kumekke bedda birri-nang Jesus, wanjh birri-marne-bard-durrungkulhdanj nuye. Kaluk birri-buyika minj birri-woybukwoyi bu nungka dolkkang. ¹⁸ Wanjh Jesus kam-wam kure darnkih bedberre. Ben-marneyimeng, “Nawu Ngabbard ngan-wong kunngudj nuye, nga-karrme kunngudj nuye. Nga-worhnau rowk kure kaddum kure kondanj kukurlk. ¹⁹ Wanjh ngurri-ray kure birri-warlah-ken bininj nawu birrim-dolkkang kubolk-bubuyika kuwern. Mak ngurben-bukka ba ngayi ngandi-kadjung. Ngurben-kodjdjuhkemen kure kunngey Ngabbard, Beywurd, Nawaralmakkayken. ²⁰ Ngurben-bukkabukka kuwern rowk kure marneyimeng ngudberre ba ngayi ngandi-wok-marrkmang. Woybukki ba karri-djarrk-re ngayi dorrengħ munguyh mak kure ka-yi-ngurdme rowk.

Luke

Andjel bim-yikang Meri

^{26b} Kod bi-munkeweng namekke andjel [angel] Kabriyel [Gabriel] kure ku-bolk-kimuk ka-bolk-ngeyyo Nadjared [Nazareth], kure ku-bolk-warlah Kalili [Galilee].

²⁷ Bi-munkeweng bi-marne-bebmeng ngal-yawk ngalu minj bininj bene-yuwirrinj.

Ngalekke ngalu mak birri-berrebbom bininj minj bene-marrimeninj nawu ngeyyoy Djodjib [Joseph], nawu King Deybid [David] bene-mud. Ngalekke ngal-yawk ngalu ngeyyoy Meri [Mary].

²⁸ Namekke andjel kam-wam bi-marneyimeng, “Ngudda ngalu Kod ngun-marneyimeng bu ngudda yi-mak, wanh nungka ngune-djarrk-re!”

²⁹ Wanh Meri bekkang manekke kun-wok ngaleng njilng-warreminj, mayahmeng, ngalengman bengkah-bengkang yimarnek njale-kenh kune bi-marne-wokdi.

³⁰ Wanh andjel bi-ngeybom yimeng, “Meri, minj yi-kele. Kod nungka na-mak ke.

³¹ Kan-bekka, marneyime, kaluk ngudda yi-kuk-dulmuk wanh yi-yaw-mang na-rangem, wanh yi-ngey-kurrme nane wurdyaw Jesus. ³² Kaluk nungka na-kuken, ka-ngeyyo ‘Beywurd nuye Kod nawu na-djal-wernh-kimuk’.

Kod nawu Kaworhnhan Rowk, wanh kabi-marnbun nungka na-kimuk ka-worhnhan kure Deybid worhnang korroko. ³³ Kaluk nungka ka-djal-worhnhan munguyh-munguyh kure nawu Djeykob [Jacob] ngurri-mud, minj ka-ngurdme nuye, munguyh ka-djal-worhnhan.”

³⁴ Meri bi-wokmey andjel nawu kun-wok kam-kang, bi-marneyimeng, “Kaluk baleh yimerranj? Ngayi minj bininj ngane-yuwirrinj.”

³⁵ Wanh namekke andjel bi-wokmey, bi-marneyimeng, “Nawaralmakkaykenh kaluk ngun-yikarrme, Kod nawu Kaworhnhan Rowk, kaluk kun-ngudj nuye ngun-barrkbun. Ba kune ka-kurduyime, wanh namekke nawu yi-yawmang wanh namekke nuye Kod. Kaluk ka-ngeyyo ‘Beywurd nuye Kod’.

³⁶ Kune mak marneyime. Ylidjabed [Elizabeth] ngalu ngudda ngone-mud, ngaleng mak bolkkime ka-yaw-kan na-rangem, ngaleng ngal-kohbanj. Dird 6 ka-marnbun bu kah-kan, ngalu birri-marneyimeng ngaleng ngal-walirrng-warreni. ³⁷ Minj njale ka-rayek kure nungka Kod.”

³⁸ Wanh Meri yimeng, “Yoh. Ngayi nga-djal-durrkmirri nuye nawu Kaworhnhan Rowk. Bonj, nga-djare ngan-djal-marne-kurduyime manekke kun-wok bu ngudda kan-marneyimeng.”

Namekke andjel bi-bawong, wam.

2

Kaworhnhan Akadja ben-wok-rayekwong bindi-ngey-kurrmeng bininj rowk

Luke 2:1-12

¹ Kunekke wanh yimerranj, kaluk nawu worhnang namekke nawu ngeyyoy Akadja [Augustus]. Wanh ben-wok-rayekwong bindi-ngey-kurrmeng bininj rowk kure ku-bolkwarlah-kenh kure kun-red ngalenggarre Rowm [Rome]. ² (Kune wanh yimerranj kun-yungki bindi-ngey-kurrmeng kure Kiriniya [Quirinius] worhnang kure ka-bolk-ngeyyo Djiriya [Syria].)

³ Wanh bininj rowk birri-wam bindi-ngey-kurrmeng, kaluk bedda birri-bebbewam kure ku-bolk-kihkimuk bedberre.

Meri, Djodjib bene-wam kure Bedliyem

⁴ Nungka Djodjib bolk-bawong Nadjared [Nazareth] kure Kalili [Galilee] ku-bolk-kimuk, yawoyh-dolkkang wam kure ngalenggarre kun-red Bedliyem [Bethlehem] kure Djudeya [Judea]. King Deybid [David] ni korroko kumekke kun-red. Namud nuye Djodjib.

⁵ Nungka Djodjib wanjh wam ngey-kurrmerrinj. Meri [Mary] bene-djarrk-wam ngalu birri-berrebbom nuye kuk-dulmuk-ni.

Meri bi-yawmey Jesus

⁶⁻⁷ Kure Bedliyem [Bethlehem] Djodjib [Joseph], Meri [Mary] minj bene-ngalkemeninj kun-red bedda minj bene-yuwirrinj, bene-wam bene-yoy kun-red kure mayh kaberrkdi man-me yoy.

Kumekke beneh-ni wanjh kam-wam ngalenggarre bih-bom wurdyaw kodjyungki dolkang. Bi-karrmeng ngal-badjan kumekke bi-rrukkang nungka bi-wayhkeng, bi-kurrmeng kodjdjeyoy kure mayh kun-dalk.

Andjel ben-marneyimeng djebed bi-mulewam Jesus

⁸ Minj djarreh rayi, kunekke rerrih kun-kak kam-wam, wanjh bininj birrim-bebmeng kure kun-dalk kun-red bindi-nahnang bedberre mayh birri-yoy.

⁹ Kunekke rerrih andjel [angel] kam-kang kun-wok kure kaddum-beh birri-djaldi. Birri-nang ben-wayalhmeng nungka Ngabbard ku-wern kun-red bedda wanjh birri-keleminj. ¹⁰ Andjel yimeng, "Minj ngurri-kele. Ngayi nga-karrme woybukki kun-wok ngudberre ngurri-djalwern kure ku-bolkwern."

¹¹⁻¹² Bolkki ngal-yawkyawk kabi-karrme wurdyaw bininj kumekke kure Bedliyem, kumekke kun-red kure Deybid [David] djordminj. Ngurri-ray kumekke ngudda ngurri-yawan. Nungka birri-dukkang kun-madj birri-kurrmeng kayo kure mayh birri-yoy. Ba ngudda ngurri-bengkan mane kun-wok ngayi marneyimeng ngudberre woybukki. Namekke na-kudji ka-re ka-kukmarnbun bininj. Na-djalkudji Ngabbard bi-weykang kadberre karri-djalwern Kaworhnhan kadberre."

¹³ Kuneng yimeng birri-wern andjel birri-woh-bebmeng kaddum-beh birri-di namekke andjel. Birri-manjbom Kod. Birri-yimeng, ¹⁴ "Bulkidj karri-marnedjare Kod nawu kaddum kah-ni. Ben-kange-karrmeng nuye bininj kure birri-marne-durrkmirri."

Djebed birri-wam birri-nang Jesus

¹⁵ Andjel bindi-bawong birri-durndi kaddum. Bininj birri-marneyimerrinj, "Karri-re Bedliyem [Bethlehem], karri-nan Na-kimuk kan-bengdayhke kadberre baleh yimeng."

¹⁶ Birri-dokorrokmeng bindi-nang ngal-badjan kornkumo wurdyaw yoy kure kun-dalk mayh birri-yoy. ¹⁷ Kaluk bedda bindi-nang bindi-wok-mulewam andjel ben-marneyimeng namekke wurdyaw.

¹⁸ Kaluk, birri-wern bindi-bekkang bedda djebed [shepherds] birri-mulewam. Birri-wern birri-djurrkwong. ¹⁹ Mary bi-wok-karrmeng djebed kure bedda birri-marneyimeng.

²⁰ Wanjh djebed birri-durndi kure birri-nahnang. Kun-kange dorrengħ birri-manjbom Kod birri-bekkang birri-nang, wanjh durrkmirri rowk andjel [angel] bindi-marneyimeng.

Ngal-babjan Kornkumo Bene-kang Jesus Kure Dempel

²¹ Bu kun-kodjdje 7 wanjh kam-wam nungka wurdyaw lakkayenminj. Bedda bene-ngey-kurrmeng 'Jesus'. Manekke kun-ngey andjel [angel] bi-yingkih-wong bu ngal-badjan minj bi-yawkayinj.

²² Wanjh korroko kam-wam kure Modjidj [Moses] nuye kun-wok wok-yoy nuye Kaworhnhan bu daluk kabirri-kuk-djirridjburren wurdyaw-kenh. Wanjh Djodjib [Joseph], Meri [Mary] bene-kang Jesus kure Djerudjalem [Jerusalem] nungka bene-wong Kaworhnhan kadberre.

²³ Wokyoy nuye nawu Kaworhnhan, "Binihbininj birri-yungki bedda wanjh birri-djamun nungka Kod nuye kornkumo ngal-badjan wanjh kabene-yawwon"

²⁴ Kun-wok nuye Kaworhnhan, ngal-badjan kornkumo kabene-won priest mayh namak bokenh marlum, ka-bun Kod nuye, bokenh marlum. Bedda bene-yimeng Meri, Djodjib.

Djimiyon bi-wanjbimey Jesus

²⁵ Kumekke Djerudjalem [Jerusalem] na-kudji bininj nawu ngeyyoy Djimeyon [Simeon], na-mak bininj, Kod nuye man-karre karrmeng rowk. Mak nungka bi-djal-madbom Kod kure Yidjrayel [Israel] nuye mawah-mawah ben-marnbom. Nawaralmakkaykenh bene-djarrk-wam.

²⁶ Korroko bi-marneyimeng Nawaralmakkaykenh nungka minj ka-rrowen, kabi-nan werrk Christ nawu Kaworhnhan Rowk kan-berrebom kadberre. ²⁷ Kumekke Nawaralmakkaykenh bi-kadjuy kure dempel [temple] birri-di yiwarrudj. Ngalbadjan kornkumo benem-yaw-ngihngimeng Jesus na-ngarrken-ni, bene-marne-kurduyimeng kure man-karre yoy, ²⁸ wanjh nungka Djimeyon bi-wanjbimey, bi-burlumeng Kod yimeng,

²⁹ "Bolkki Kod ngayi nga-rrowen nga-djurrikwon ngayi nga-kukmononmang kan-berrebom ngayi. ³⁰ Ngayi nga-nang ku-mim ngardduk, ngudda nawu kan-wong ngadberre nane wurdyaw ngan-yerrkke ngan-kangemarnbun ngadberre. ³¹ Yi-yingkih-karre-marnbom bininj birri-wok-buyika rowk ngundi-kurdunan. ³² Nungka ka-bolk-wayalhme yiman kun-dung kure birri-wern bininj ku-bolkwern. Nungka ngun-bukkan ngudberre kun-kerrnge ngudberre ngudda Kod. Ngunmarnbun ngudberre birri-buyika bininj kabirri-wok-marrkmang Yidrayel ngurri-mud."

³³ Kornkumo ngal-badjan bedda wanjh bene-mayahmeng bu Djimeyon yimeng bi-mulewam Jesus. ³⁴ Djimeyon ben-marneyimeng, "Nga-djare Kod ngun-marneyime ngurre-woneng bu kamak."

Bi-marneyimeng ngal-badjan, "Kan-bekka, marneyime nane wurdyaw Kod bi-munkeweng bu bininj kaben-larlmang, kaben-marnbun birri-wern kabirri-bawon Kod wanjh kabirri-mayahme. Mak kaben-marnbun birri-wern kabirri-yikan kaben-yerrkke Kod. Nungka kaben-bukkan bu Kod kun-ngudj nuye. Birri-wern kabirri-wirrihme. ³⁵ Kod bi-munkeweng nungka kaben-marnbun bininj birri-wern kabirri-mayali-bukkarren.

Ngudda ngal-badjan wanjh yi-djak-bekkan yiman rerrih man-djawak ngun-kange-dulubun."

Ana ben-marneyimeng bi-mulewam wurdyaw Jesus

³⁶ Kaluk mak kumekke ni ngal-kudji ngal-kare ngalu bi-wokmulewam Kod, ngalu ngeyyoy Ana [Anna], ngalenggarre kornkumo ngeyyoy Banyuwel [Phanuel], bedda birri-mud Adja [Asher]. Ngaleng wanjh kohbanjminj. Bu ngal-yawkyawk-ni bene-marrinj bininj, beneh-ni bu man-djewk 7, wanjh nungka doweng.

³⁷ Wanjh ngaleng ngalu ngal-bamu-ni munguyh bininj-yak, ngale wanjh kohbanjminj, man-djewk 84 ngalenggarre. Ngaleng minj rurrik-bawoyinj kure dempel [temple], munguyh-munguyh djaldi yiwarrudj bolk-nahnang kure kun-rurrik nuye Kod, benbekad mak ku-kak, man-me bawong bi-djawam Kod kun-wern.

³⁸ Kumekke Jesus birrih-ni ku-rurrik, kunekke rerrih Anna ben-marne-bebmeng, wanjh bi-manjbom Kod, bi-mulewam Jesus, kure bininj birri-madbom Kod ben-yerrkkeng bininj nawu birrih-ni kure Djerudjalem [Jerusalem]. ³⁹

Nungka Jesus Djordminj

⁴⁰ Nawu wurdyaw djordminj, kun-darrkid nuye murrng-rayekminj, kun-mayali dorrengħ nuye wernminj Kod bi-marne-durrkmirri kun-mak nuye.